



Nunatsinni meeqqat angerlarsimaffiup avataanut inissiisarnermut atatillugu aningaasartuutit annertuumik annertusiartuinnartunut qanoq annikillisaasinnaanarluta, immikkut ilisimasallit suleqatigiissitaq piviusorsiortunik innersuussisussatut pilersinneqarnissaat anguniarlugu Naalakkersuisut peqquneqassasut Inatsisartunut aalajangiiffigisassatut siunnersuut. Tamanna kommuunit angerlarsimaffiup avataanut inissiisarnernut aningaasartuutigisartagaannut annertusiartuinnartunut annikillisaanissaq siunertarlugu. Innersuussutit meeqqat ineriartornerannut, toqqissisimanerannut aammalu illersorneqarnerannut innarliissanngillat. Innersuussutit UKA 2024 nallertinnagu saqqummiunneqassapput.

(Inatsisartunut Ilaasortaqaq Bjørk Lange Olsen, Demokraatit)

(Siullermeerneqarnera)

Qujanaq Demokraatit Inatsisartuni ilaasortaataannut Bjørk Lange Olsen-imut siunnersuummut pitsaasumut ajunngitsumillu isumalimmut.

Meerartagut pigisaraagut, nalitunerpaat. Inersimasutut angajoqqaatullu akisussaaffigaarput meerartatta pitsaasumik toqqissisimasumillu meeraatinnaat. Maani nunatsinni inersimasut amerlanerpaat meeqqatik asanninnermik annertuumik pitsaasumillu perorsaanermik tunisarpaat. Taakku angajoqqaat tamaasa nersualaarniapka qutsavigalugillu taamaaliorneqartariaqarmatami.

Ajoraluartumik sulii maani nunatsinni inersimasoqarpoq, angajoqqaajussallutik naleqqutinngitsunik. Tassunga pissutaasut assigiinngillat, kisiannili tassa imaattoqartarpoq, meeqqanut ajunnginnerpaaq anguniarlugu akisussaaneq inuiaqatigiinnut tunniunneqartarluni, angajoqqaat namminneerlutik namminneq meeqqaminnik isumaginnissinnaanngimmata.

Tassani Demokraatinit isumaqarpugut, amerlanerpaatigut meeqqanut pitsaanerusartoq angajoqqaarsianut asannittunut inissinneqarneq. Ajoraluartumillu angajoqqaarsiat amigaatigineqarput, tamassumalu kinguneraa, meeqqat arlallit ulloq unnuarluni inissiisarfinnut inissinneqartarnerat pisortanut aningaasartuutaanerulernermik kinguneqartumik. Tamanna ajorluinnarpoq, ajoraluartumik imaappasimmat, pinaveersaartitsinrigaluit, meeqqat sumiginnarneqarnerinik annikillisaatissatut siunertatut ingerlaneq ajormata.

Siunnersuuteqartoq uani isumaqatigaarput, pisariaqartoq misissussallugu, qanoq ililluta angerlarsimaffiup avataani inissiinermut aningaasartuutit appartissinnaanerigut. Kisiannili siunnersuuteqartutuut erseqqissarusupparput, suliniutaasut meeqqat ineriartornerinut, atugarissaarnissaannut inatsisitigullu illersorneqarnissaannut ajortumik kinguneqartussatut suliarineqassanngitsut. Tamanna pingaartorujussuuvooq uagutsinnut Demokraatinut.

Maluginiarparput, Naalakkersuisut allannguutissatut siunnersuusiorsimasut taanna kisiat isiginiaraanni ajunngitsumik. Siunnersuulli siulleq Inatsisartunut ilaasortamit Bjørk Lange Olsen-imeersoq iluarineruarput,



taannalu akuereqqullugu innersuussutigalugu Ilaqutariinnermut- aamma Peqqissutsimut ataatsimiititaliami suliareqqinneqartussatut innersuussutigalugu.